

一樓居詩稿
四繪軒詩鈔
春草堂遺稿

天馬山房詩別錄
清聞齋詩存



春
草
堂
遺
稿

姚陽元 著

中
華
書
局

予生七年。始就外傳。常是時。季父味青先生。與仲弟子湘。叔子舒堂。年俱五歲。四人者。啣晤一室。每以讀書多寡角勝負。及長爲詩文。其角勝負亦如之。道光癸卯。予應京兆試。充解額。丙午。季父與兩弟同應京兆試。不第。己酉。復應京兆試。又不第。季父子湘怡然也。舒堂獨鬱鬱不得志。蓋其氣已衰矣。庚戌。先府君棄諸孤。辛亥。子與舒堂自江西奉太夫人歸湖州。舒堂既不得於有司。又猝遭大故。益頽放不自得。予屢解之。不聽。竟以此致疾。越二年遂卒。時咸豐三年六月三日也。舒堂性穎異而好學。爲詩文皆詳贍有法。嘗撰剛日柔日讀書志。未就。遺文亦散佚。今所存者僅詩一卷。蓋其少時在京師作也。予既悲舒堂之早逝。而又嘆其文字散佚。不獲表見於世。因刻先世遺文。並取此詩刻之。以存其跡。題曰春艸堂。蓋取謝靈運詩意。亦先公刻夜雨軒小題文例也。時光緒二年九月。歸安姚覲元。

春艸堂遺稿

清 歸安姚陽元舒堂著

詠懷九首

詩以言志。有得卽書。殊無詮次也。

物理有盛衰。造化無厚薄。元氣相盪摩。剛柔自交錯。春陽一已敷。萬樹散紅萼。秋飈拂地來。落葉聲蕭索。試問花何心。花閒殊漠漠。不賀春風榮。詎怨秋風落。山勢有高下。月象有圓缺。缺後圓方新。下處高逾絕。物象固皆然。事理原無別。世人貴滿盈。一發遂永竭。所以殫巧思。適足形其拙。君子守其愚。居易懷前哲。春風如長者。可愛不可名。好花如美女。可近不可輕。下士好堅僻。君子貴自清。務名遠流俗。矯飾非真情。幽蘭生巖谷。冒雪自含英。取實雕欄下。欣欣亦自榮。明月在碧天。所照無不及。清風捲大地。所至無不入。其貌似可親。其清殊足挹。孤桐生龍門。翱翔衆鳥集。取作五絃琴。其音乃獨絕。

天高不可窮。地廣不可極。何容坐井觀。詎能以指測。古人有所遺。各自具淵識。後世徒昏昏。相斷乃以臆。無惑開卷時。不能辨黑白。長嘆還自規。勸哉宜努力。鸞鳳聖朝瑞。雙雙翔紫雲。羽毛輝五采。煥爛錯錦文。和鳴碧霄上。聲清天下聞。視彼鷦鷯屬。藻飾徒繽紛。

良馬出天廐，峭崿垂青驤。四蹄濺銀雪，首尾珠絡籠。奔蹏追健翮，吞吐劃長虹。二十四萬匹，神采無其雄。道途逢伯樂，昂首心早通。長嘶向朝日，獵獵生勁風。騰驤十萬里，曄曄皆凡庸。涼蟬鳴高柳，其音一何清。餐風吸朝露，獨立無所營。處世能自潔，終有清越聲。何爲務貪得，致令當世輕。白雲南山巔，遙望如可呼。舉手試招致，雲去不我娛。雲豈有去住，舉世徒自愚。爲霖碧霄外，度鶴青海隅。長風吹浩蕩，任適誰能拘。

清夜

欹枕不成寐，松風引別心。相思渺何處，中夜撫瑤琴。霽雪人千里，寒梅月一林。澄懷付沙鶴，遠寄白雲岑。

荊棘

荊棘生高崖，險惡蔽巖洞。稠葉藏虬蛇，濃陰蒸霧霧。不堪析作薪，詎能任以棟。編之爲藩籬，園圃增清供。乃知無棄物，所使在得中。生材有美惡，責任分輕重。激之爲我仇，撫之爲我用。

遊永樂寺

白雲圍野墅，萬木抱珠宮。泉激林端雨，樓吞天外風。梵餘清磬遠，嘯徹暮山空。別有真禪味，冥心月正中。

雪夜

長風邀雲至，凍作漫天雪。飛舞下空庭，處處瓊瑤綴。苦吟不得眠，推窗詫奇絕。溶溶萬樹花，皓皓千山月。

憶大人在粵

生兒亦何益。衣食累吾親。欲作一家計。因爲遠客身。有心依鳳闕。何日向楓宸。聞道烽烟息。思歸應已頻。

卽事有感

癸卯年作

忍將下策補權宜。可惜孤忠等薙葵。擊楫何人爲祖逖。借頭空自向於期。連江凍雨鯨鯢戮。古戍荒烟鵲鷺移。陛下好生天地德。慎刑欣見盛良時。

聞詔下偶書

癸卯冬作

紫禁傳天語。彤庭納諫誠。諸君宜努力。何計贊承平。閭閻非難叫。風雲合有成。壯懷期許國。天地一書生。

哀朱馨山夫子

花冷窗前樹。琴稀海上聲。頓驚星被犯。旋嘆榻終塵。悲悼誰能止。憂傷不覺頻。爲因思我學。輒復想其人。有母悲垂暮。生兒痛不辰。未登中下壽。竟作百年身。久在春風坐。分沾化雨均。偕兄同請業。有姊附昏嫻。踪敢追游夏。才原愧子春。傷心看易簣。回首憶書紳。歲月來何易。高風嘆久湮。墓門滋宿草。荒野閃秋燐。渺矣神何往。嗟乎志未伸。未成場室築。遂痛酒壚陳。絳帳渾如昨。庭花又幾新。空堂秋雨夕。苦憶淚沾巾。

白菊花

年來陶令住鷗村。花韻詩情淡莫論。好向波心澄素影。欲從籬腳訪秋魂。昨邊送酒人開徑。松外棲雲鶴款門。多少高人尋舊約。滿簪霜鬢泛清尊。

愛蘭曲

愛蘭者。揚之麗姝也。少失怙恃。依金氏母。因金其姓焉。通文墨。知音律。阮咸其所長也。隸籍居揚之德星街。恆矯矯自持。不與羣婢伍。所人詞客數顧之。輒引去。以故接其顏色者少。獨與布衣楊覲文秋笛善。秋笛工詩。善畫。能擊劍。性跌宕不羈。嘗從事江淮間。鮮所遇合。遂絕意進取。益不修邊幅。遨遊曲巷。兼好樽蒲。蘭獨一見傾心。許爲奇士。凡所以濟其緩急者。靡不周至。往來數年。不及於亂。間入以游詞。則泣曰。從郎亦妾分。必待歸郎。方可無憾耳。謹此身以俟君子。楊感其情。固將納之。適囊乏。事遂中止。而心固無時忘愛蘭也。無何。鴛母遷家袁江。攜愛蘭去。蘭爲楊彈四絃一閏。聲淚俱下。顧楊曰。相遇竟止此乎。楊亦泣下。莫能仰視。遂別去。楊後以事四至袁江。徧訪之。迄無知愛蘭者。楊述之不勝悵悵。僕感愛蘭之知人而不遂其志也。時被酒。作此詩。

曾向維揚撥桂橈。落花如繡霧如綃。春風楊柳隋堤路。秋月空江廿四橋。廿四橋頭狹斜路。笙歌桃李婦相妬。一色芙蓉十里花。兒家近在花深處。煬帝行宮在比鄰。前身合是玉鉤人。門前一片秋江水。不種新荷種白蘋。白蘋花發江波綠。畫舫蘭舫任追逐。繡戶祇令翡翠巢。紋波不許鴛鴦浴。鴛鴦翡翠各無情。浪向春風賭翼輕。只有小樓新燕了。拚畱身價重連城。連城身價同荇藕。歌場不惜知名晚。玉洞桃花自有春。畱待人間劉與阮。秋笛楊生老布衣。雄才俠氣世原稀。笑談曾卻千金贈。志量常期六翮飛。奮飛一擊摩雲翅。可憐不遂平生志。仗劍雄心猛可消。回頭謝卻英雄事。兒女英雄事本倖。權將寶鏡換吳鉤。拋將前此封侯夢。一舸人間事勝遊。勝遊正及三春日。寶馬連錢馳駛疾。豔女爭持鸚鵡杯。妖姬羣載瑤瑤筆。

琉璃寶炬滿華堂。狎客羣稱祝壽觴。妙舞共看楊柳步。醉歌高踞合歡床。合歡春樹成連理。當時意氣驕
羅綺。謝傳筵前盡妙姝。春申門下皆珠履。盛事還看似影沈。無端散盡阮囊金。紅雲另有鴛鴦侶。繡戶難
同翡翠衾。蕭蕭楊柳清明道。單車寂寞尋芳草。妍景當前劇可憐。春山依舊容顏好。容顏慘淡起長歎。舊
侶誰憐范叔寒。有酒借聽金縷曲。無人共倚玉闌干。闌干閨靜桃花冷。回船打槳穿菱荇。萬頃瑤堦淡淡
波。波心忽照娉婷影。娉婷婀娜世無雙。畫艇初逢窈窕娘。卓女縱令顏似玉。相如無意鳳求凰。求凰綵鳳
非無意。捫心暗掉窮途淚。祇爲方遭冷落悲。何堪重被烟花媚。烟花弱質本嬌癡。不愛笙歌愛詠詩。偷許
小郎風調絕。轉教侍婢爲通辭。辭中不盡心中願。傳書青鳥殷勤勸。幸得韓郎結綺緣。莫教紫玉生紅怨。
紅怨難勝相見初。盈盈恰是十三餘。豐容盛鬋殊妍絕。不讓春風女校書。雲容半掩徐通語。自言身係倡
家女。生小閨中能畫眉。妝成每被侯門許。侯門情意但憐新。莫向尊前賭笑嚬。且得梁鴻偕伉儷。同耕原
不厭清貧。雲鬢低墮蛾眉盛。梨花帶雨幽香馥。珠串雙垂泣露紅。愁雲萬疊縈冰縠。窮途能識畫眉郎。從
此雙心結綳繻。繡戶春深巢翡翠。紋波日暖浴妃兒。郎心結意明如電。相遮不用坤靈扇。並蒂芙蓉本自
雙。俱飛蛺蝶原相戀。相戀相依幾度秋。天心人事換悠悠。但令眉桀長相守。不羨人間萬戶侯。無端阿母
生憎厭。僑居欲賣紅兒豔。冷霧侵殘豆蔻花。橫流生拆豐城劍。死別生離一刻間。牽衣各自淚潛潛。縱知
此後能重會。已是天涯費往還。往還知更歸何處。柔絲難買風中絮。嘶斷秋江班馬聲。無言揮涕登車去。
去住憐同水上萍。訪君從此問郵亭。知能終竟團圓否。公有山園故國青。

重題愛蘭曲後十絕

我本蓬萊舊散仙。無端疎放學情禪。憑將兒女嗚咽事。賦作狂奴第一篇。
江草萋萋江水平。扁舟何處問郵程。石娘深曉離人恨。應爲楊郎阻此行。
朱箔青樓汴水濱。憶曾此地問漁津。劉郎再到天台路。鶴靜雲閒不見人。
一抹青山婦黛螺。殷勤舊院幾回過。重門深掩更誰在。暮雨秋風冷薜蘿。
年年柳色上粧樓。空剩湘簾掛玉鉤。悵望仙蹤何處駐。白雲西去水東流。
苔跡紆斜上院牆。蝸涎結曲篆匡床。小樓春靜無人住。空有桃花豔夕陽。
綠楊烟外曉啼鶯。根觸離懷帶宿醒。春影一簾新雨後。隔牆猶聽賣花聲。
江流如鏡霧如煙。記得論詩共畫船。廿四橋頭秋夜月。消魂依舊十分圓。
莫對金樽憶柳枝。休拋紅豆怨相思。三生杜牧原同恨。爲輩銀箋寫豔詞。
忍拋舊誓換新盟。未卜他生了此生。紅粉飄零芳槿改。轉將多事笑鍾情。

題仲兄子湘先生詩稿

夢中推枕忽狂叫。六丁奉命下捉賊。謂是銀潢碧漢間。天孫雲錦被人竊。坐令天下奇文章。一朝元氣將盡洩。醒來大笑自稱奇。珠璣照眼光陸離。披衣坐起試一望。案中堆積何人詩。取真懷中不敢讀。打窗奇鬼爭來攫。是誰鑄此錚錚詞。聲振扶桑享天福。無端阿兄推門求。一笑謂君且自休。云有一編舊吟草。昨

宵偶置君案頭。

和子湘兄晚秋雜興五首

江上芙蓉花。昨夜因風起。瑟瑟暗無邊。一片西江水。
好酒不滿杯。鈔書不盈篋。秋風送詩來。打窗飛黃葉。
倦鳥自知還。日暮寒林宿。好花甘耐冷。細雨開籬菊。
石插山數峯。香裊雲萬疊。小館無人過。讀書日千葉。
寒竹夜蕭森。風螢時明滅。一聲旅雁來。喚冷梧桐月。

曉妝

對鏡理新妝。素面流晴雪。鏡光照面寒。面寒心轉熱。
鬢髮細如絲。挽作同心結。蟬鬢壓玉梳。翠雲吐微月。
顧影兩相笑。低徊自怡悅。攬鏡儂有雙。比世儂無匹。

答蒲艾田見贈

佳人何婉孌。貽我以瑤琴。感此纏綿意。中懷轉憂沉。
豈無所以報。誠恐非本心。良時維仲夏。若榴破紅襟。
言念時易逝。勵志惜光陰。交情如流水。終古有清音。
行行須努力。永佩金石箴。

清明

新茶欲熟曉煙輕。小坐攤書倚石坪。幾點桃花數枝柳。
澹雲微雨作清明。

送遠曲

晨起送郎行。郎行向何處。不省出閨門。魂夢隨郎去。

菊

晚節能傲霜。世之有道者。陶令太相輕。寄以東籬下。

題吳少良孝廉之翰鶴溪漁隱小照

白雲灩灩花冥冥。溪光山色相與青。不知雲龍放鶴處。疑是子美滄浪亭。臨淵結網者誰氏。神與山水爭清冷。欲與之言殊不顧。訝如摘宿非凡人。叶莞爾而笑鼓枻去。衆人皆醉我獨醒。

元日試筆

小几放盆梅。獨坐饒清思。染筆試紅牋。先作平安字。

楊白花

楊白花。因風度江北。江北不復還。宮樹凋顏色。春愁坐似楊花多。楊花不歸奈若何。

讀張耳陳餘列傳

里門共食舊知名。一印無端暗隙生。桑下數言猶在耳。可憐雲雨等交情。孤城四面擁戎車。戰守終成釜底魚。其死何如當大任。平生忠信誤陳餘。

烏夜啼

月光如水花含煙。錦帳佳人愁不眠。紗窗半掩秋光妍。紅淚凝冰角枕邊。角枕邊。淚如霰。烏夜啼。今郎不見。

擬曹唐大遊仙五首

劉晨阮肇遊天台

鶴唳猿啼隔岸聞。尋源緩緩步苔紋。仙禽引隊啣新果。芳草無心對夕曛。十里紅霞蒸香餠。一溪香雨散繽紛。涓涓流水歸何處。洞口桃花笑白雲。

劉阮洞中遇仙人

雲容草色瑣斜暉。採藥殷勤問翠微。隔岸桃花隨澗出。沿溪沙鳥背人飛。仙源有路乾坤別。雞犬無聲世界非。何處玉人閒悵望。一欄香霧濕羅衣。

仙子送劉阮出洞

恨別依依落照邊。倩郎爲繫翠雲鉤。莫將此會疑塵夢。好待重來結綺緣。玉洞桃花春自早。碧山明月夜遲圓。仙郎此去歸何處。碧草連溪瑣暮煙。

仙子洞中有懷劉阮

綠陰晝靜鳥聲柔。洞裏春深萬斛愁。明月有時圓碧海。桃花無計引漁舟。瑣窗日暖烟如夢。玉澗雲閒水自流。此日遙知塵世外。傷心何處問仙洲。

劉阮再到天台不復見諸仙子

山光欲斂夕陽沈。仙界何能得再尋。環珮無聲春寂寂。樓臺籠霧晝愔愔。桃花猶似前時豔。溪徑渾疑此日深。惟有迎人舊猿鶴。清音仍度白雲岑。

窗外桃花數枝盛開

細草蒼苔一逕勻。小桃含露寫陽春。碧紗窗外東風軟。笑倚危欄欲喚人。

珠江秋景圖爲吳秋衣重光題

珠江渺渺秋如畫。夾岸垂楊藏舞榭。寶馬紛投鏡檻前。錦帆爭駐紅樓下。紅樓小女色傾城。繡閣粧成媚態生。瓠齒微呈花韻動。纖腰低轉柳枝輕。柳枝春軟嬌無那。衣香鬢影隨輕舸。一片斜陽萬樹花。浮雲不把閒愁瑣。憶昔珠江放櫂時。仙郎秀骨女嬌姿。畫鷁比翼綳蓮底。綵蜨聯飛錦樹枝。枝頭嫩萼春方豔。香淚盈盈清露沾。已分珠崖久客居。無端浙水縈歸念。握手曾無相見期。臚舟欲別又羈遲。可憐一點珠江月。仍自團圓照酒卮。征帆一夕秋風起。故鄉風景遙堪指。回首珠崖載酒天。芙蓉零落秋江水。秋江日暮思悠悠。雁杳魚沈又幾秋。飄零紅粉歸何處。空有垂楊掩畫樓。伊人自此難重見。依稀猶憶春風面。莫問新恩屬阿誰。暫將舊恨圖生絹。君不見畫舫青船江水濱。朱顏媚骨總成塵。杏花結子楊花落。我亦天涯薄倖人。

雨後與子湘兄歷游城南諸寺

小雨初欲來。涼風颯然止。萬木寂無聲。相待若含喜。盆山不盈丈。青嶂各秀峙。泠泠尺布懸。一片飛泉水。蒼松蟠危崖。裊裊垂青蘚。對此移我心。一往桃源裏。悵望武陵漁。斯人今已矣。

蒼蒼竹林寺。珠殿隱叢林。白雲歷今古。烟雨此山深。振步起游覽。坐愁風露侵。城南多勝境。攜屐且追尋。青山開圖畫。綠水調鳴琴。清風宕涼爽。暢然豁胸襟。若溪渺何處。惜兮縈歸心。何當買櫂去。共擁綠葦吟。

秋衣將之口北

揮手自茲去。寒城起暮鴉。清風聞戍鼓。丹嶂擁邊花。風土宜頻問。車塵未足嗟。最憐秋夜月。相望隔天涯。好友無多日。飄然又出關。雲中多旅雁。塞北少青山。冠劍平生事。天涯幾日還。行行須慎重。詩酒慰朱顏。

松筠庵

公昔抗疏日。正氣攝百靈。披髮叫閭闔。肝膽瀝明廷。九天誠非遠。達帝帝不聽。白日慘無色。酸風盪八溟。陰霾眩天地。陡爾隕寒星。當公獻言時。豈昧招禍刑。男兒未報國。得死目不瞑。松筠公故宅。聞之始五齡。眷眷十餘載。今始履公庭。庭前古松樹。獨立何亭亭。白雲不可掩。天地相與青。再拜肅然退。視此爲典型。

泰岳篇輓孫烈婦

烈婦山左孫氏女。適淮水彭氏。夫遠出。以奪嫁死之。

嶢嶢泰岳。神靈之府。浩浩淄川。正氣斯聚。聿萃其秀。聿大其祐。篤生名媛。爲世之矩。其生伊何。與公之族。幼而貞慧。長斯善淑。如桂倚巖。如蘭在谷。其聲伊遠。其志伊肅。厥維彭生。明德之後。學紹匡劉。名參

濤秀臂彼良馬終超天廐允矣清門舊惟昏媾占鳳乘龍卜云其吉佩纓結言絳紗論匹曰既嬪之用
宜爾室灼彼青廬桃花豔日昏姻既合嘉禮既成君曰歸止爰從君行別我父母越及弟兄蕭蕭車馬
迢迢征程既見舅姑用謁祖廟蒞闈無私蘋蘩克肖彤管思箴素纁莫銷虔恭中饋柔德是耀宛宛
楊柳映彼紅樓春風戾止君其遠游攀條贈君送君路陲無爲樂羊斷織貽羞采采流水鬱鬱芳塘中
有飛鳥其名鴛鴦一日離羣之死不雙矧彼懿範庸敢相忘猗彼女蘿其葉渭渭黽勉從君爰得其所
哀哉觀閔奪夫嘉侶古有韓憑同茲艱處孔雀東飛伯勞西去幽恨靡窮貞魂永逝珥筆簪毫忝余是
與庶使後昆式昭令譽

降神曲

槐市之南有叢祠焉禱祀者無虛日本詩人諷諭之意作降神曲

焚椒闌兮凝香奏簫鼓兮悠揚列寶炬兮輝煌獻旨酒兮盈觴羣遊神兮闈堂神夕降兮雲鄉乘長風兮
浪浪駕四牡兮彭彭建桂旗兮央央鳴紫珮兮鏘鏘再拜神兮神降祥俾爾民兮壽而昌和且樂兮無離
亡雖清貧兮更何望

秋日偶書

曉窗日未融手把南華讀涼風從西來秋意滿庭竹

燒指行

佛氏有燒指捨身之說。謠菴嘗斥其妄。并欲著詩立石。以導陋俗。已而未果。因作此話之。

巍巍梵王宮。重門向曉啓。村民雜老幼。竭誠獻春醴。佐尊以野簌。苦茶雜甘薺。宣呼震廣殿。再拜虔頂禮。奸僧戕愚民。紛紛若眩昧。燒指延親壽。捨身療親癘。欲紓其親憂。先傷養親體。清公爲大感。極言肆痛詆。姚子聞此言。長歎爲撫髀。不見昔仲氏。爲親遠負米。

或爲地獄說。其言更誕些。刀山雜劍林。鐵床兼石磨。陰司著非刑。一一若嚴課。愚民小不謹。惴惴心自懼。謂致小傷殘。可免大折挫。燒指表至虔。頂禮蓮花座。大佛向西笑。汝曹真妄作。地獄在汝心。密勘自無過。汝毀親之枝。汝罪乃至大。

月夜喜陳子似來

幽人踏月來。共聽秋蟲語。相對各無言。理會勝煩絮。坐久興已闌。忽復荷月去。

與家弟得心論詩

詩人如戒僧。涉想卽愆宵。邪魔不一端。在在須猛省。安禪無定力。奇想忽悞悞。毒龍肆爪牙。虓虎逞擊猛。野鬼嘯平林。壞雲壓峻嶺。百怪撼我衷。涉筆多粗梗。或現將軍身。麾鉞手自秉。強兵逾十萬。峻版縱馳騁。紀律誠嚴密。肅氣侵雲冷。或以多情故。風懷聊自逞。小姬弄妍華。朱鉛媚嬌影。罵座氣降灌。施技斤弄郢。寒生涸底松。博笑書中蚓。附勢工詔笑。小故多悲哽。凡此搜我心。一一當退屏。法王坐珠殿。萬象呈嚴整。寶鼎散芳蘭。雕梁飾文杏。彩蓋輝燦燦。珠旒光耿耿。香象擁巨鼻。丹鳳交雙頸。宰官長者倫。比邱優婆倅。

摩睺金剛神。睨目四界張。莊嚴菩薩身。珠珞垂蕤炳。天女秀曼姿。窈窕明粧脆。雍容立班序。肅拜儼朝請。和風洽初地。皎皎春日永。此喻參大乘。在弟心自領。真詮苟未得。悟境猶滯境。願弟洗塵心。巨浸資清潁。

嫁女篇

鄰有豪僕嫁其女。焜耀過於達官。

鼓吹溢沸騰。旌蓋交容輿。駟馬如游龍。明珠勝寶炬。嫁女者誰氏。焜耀乃如許。父兄豪門趁。姊妹金屋貯。大府第幾郎。新結死伴侶。驕從喧路衢。官府相爾汝。出與貴侯遇。遜輿無或阻。所昵不敢親。所憎詎敢禦。名閨有清姝。生小弄機杼。父兄爲清官。不醉民間醕。禮貌素所閒。老大深閨處。紗窗碧如煙。默默誰與語。蒼然窗下松。女蘿葉滑滑。西風下庭院。自搗秋砧杵。素手不禁寒。長嘆悲心膂。嗟汝嘆何爲。汝非閨人女。

烏夜啼

江州城頭山月低。飢烏啞啞城頭栖。佳人含淚坐蘭闥。開簾望遠心悽悽。但令妾與郎重見。不管城頭烏夜啼。

雨後行小園有懷艾田翁卻寄

前年從君遊。劇談揮玉塵。去年白露下。送君還故土。今年秋風至。懷君涉芳圃。庭前合昏樹。疎莢長秋雨。豆蔓短牆陰。燦燦繁榮吐。好友不復來。此景昔曾覩。寥寥數年間。俯仰若今古。對此感我衷。世事宛飄羽。廢然臥南軒。欹枕夢天姥。